

## من موقع القوة

بقلم الأستاذ : مصطفى القوصي

عضو مجلس ادارة رابطة الزجالين

من موقع القوة وارض الانتصار  
طلعت على كل الدول شمس النهار  
كانت مفاجأة مدهشه لكل الكبار  
من سياسة العالم - وباتوا يفكروا  
في قدرة السادات على صنع القرار

\* \* \*

بطل القرار مؤمن وصادق في الايمان  
مع ربه في الأول وفي الآخر كمان  
والانسانيه في مذهبه ملهاش مكان  
هد الحواجز.. وارتفع فوق الخلاف  
ورفع رايات العدل في اصعب ميدان

\* \* \*

سيف السلام استله قائدنا الشجاع  
وغزا قلوب الخلق في كل البقاع  
وقتل جنود الشر انصار الصراع

والرافضين للحق .. تجار الكلام  
راحت عليهم واثرموا ف بحر الضياع

\* \* \*

اقصر طريق اختارها عملاق السلام  
علشان يحقق حلم مي جيش في المنام  
علشان يسود الحب بين كل الانام  
وف يوم وليله اتحقق الحلم الكبير  
والدنيا طارت م الفرح زى الحمام

\* \* \*

والرافضين مساكين معدش رفضهم  
حيجيب نتيجه في استعادة ارضهم  
نقدر نقول : زاد الخلاف بين بعضهم  
وحيث كشف ع البهلى سر الجمعجه  
دول ناس همج ميختشوش على عرضهم

\* \* \*

باب السلام لما افتتح بيد الزعيم  
شاف السعاده منوره ضحك اليتيم  
صور الأرامل هزت القلب الرحيم  
وعلى جبينه الانسانيه نورت  
واتطورت .. نحو الطريق المستقيم

\* \* \*

كان في يمينك رايه بيضا يا سادات  
شفناها ع الشاشة في عيون الأمهات  
في بسمة الطفل اللي ابوه في الحرب مات  
شفنا السعاده مرقصه قلب اليهود  
شعب و جنود .. وطفوله غضه وامهات

\* \* \*

لمحة ذكاء هبت هبوب ريح الرخاء  
متشبعه بروح المحبه والاخاء  
من اجلها بتجود بروحك في سخاء  
ربك يحقق يا زعيمنا رغبتك  
وبصحتك .. نوصل الى عنان السماء